

東
華
續
錄

東華續錄

臣王先謙

臣周瀚蕃恭校

乾隆四十一年丙申春正月癸酉朔諭軍機大臣等明亮等奏攻克獨松及卡拉爾舍斯滿一帶地方見擬直擣馬爾邦等語覽奏欣悅已於摺內批示並據富德奏已攻得馬爾邦思覺博堵等語富德自至絨布寨以來惟此次最爲奮勉已交部將伊及將領員弁從優議敘明亮等統俟大功告成再加渥賞至富德奏稱行文李世傑哈清阿調兵七百名分守後路李世傑等卽行給發等語富德調兵應用李世傑等照檄發兵所辦俱合機宜已用清字諭知富德並將此傳諭李世傑哈清阿知之並據富勒渾奏據報十二月十八日已將舍齊喇嘛寺攻克隨於本日晚間發兵圍攻噶

拉依等語阿桂等既得舍齊喇嘛寺應卽奏報見在未據具摺必
因進擣賊巢爲埽穴擒渠之計刻不容緩無暇繕摺是以富勒渾
奏報在前今日正值元旦連得捷音深爲欣喜阿桂等已偪賊巢
卽可設法擒捕索諾木及逆黨等全行弋獲獻俘蒞事佇望紅旗
指日馳遞將此由六百里加緊傳諭知之○甲戌諭前據邁拉遜
奏拾獲匿名揭帖一紙內有開寫縣德阿哥賞給禮部郎中秦雄
褒字畫食物並經相見送禮一節隨密令福隆安察訪今據奏稱
拏獲曾在縣德阿哥處雇工之馬成蘇二訊供秦雄褒曾進見縣
德阿哥致送畫冊鑪瓶等物縣德阿哥亦賞給綉紗字扇屬實此
事甚有關繫阿哥在內廷讀書理應謹慎自持不當與外人交接
况秦雄褒不過一禮部漢司員與阿哥等毫無干涉非若書房行
走之翰林等可比秦雄褒何所爲而必欲謁見縣德縣德亦何所

爲而必欲認識秦雄褒乎秦雄褒係秦道然一家從前秦道然在康熙年間卽有交通塞思黑之事其家風本不醇謹今秦雄褒復敢如此幸而早爲發覺尙不至久滋事端此卽阿哥等之福若不示以懲儆恐諸皇子皇孫無所畏憚漸失我朝家法縣德著革退王爵卽令縣恩承襲縣德之師傅李中簡不能教誡管束咎無可辭該員本係緣事降調復經賞給編修職銜仍令在書房行走今復不能盡職卽著革職逐出書房至秦雄褒身爲司員敢與縣德餽送殊屬可惡著革職卽日發往伊犁不准贖罪至此事係朕特交福隆安查辦若復稍存徇隱不肯據實查出朕必重治其罪福隆安甯敢瞻顧阿哥等而轉不畏朕乎經此小懲大誡不特縣德當知感愧卽皇子皇孫亦均當感激自勵若因福隆安之查奏輒心懷嫌怨斷難逃朕洞鑒必不稍爲寬宥也將此通諭知之至投

遞匿名揭帖之人仍著軍機大臣查審具奏○阿桂豐昇額海蘭察額森特奏由則朗噶克丫口上搶喇烏喇山梁於十七日將各礮卡賊眾殲戮遂占據瑪爾古當噶礮卡並克獲山梁迤東一帶寨落海蘭察由噶占進攻占得爾隴山坡是日夜我兵齊抵舍齊喇嘛寺併力勦殺復攻克雍中喇嘛寺卽於十八日將格爾巴夾木巴雪寨下至克角干登均經搶占見派兵分路攻噶拉依礮寨兩三日內諒可合圍投出頭人達什阿庫魯錄供呈覽至本日晚間有投番來稱索諾木之母姑姊妹見於甲納雜爾渡河前來此時另行奏聞諭阿桂等奏大兵分路攻克喇烏喇瑪爾古當噶一帶礮卡並克取得爾隴搶占舍齊喇嘛寺雍中喇嘛寺殺戮有名賊目痛殲賊番見在攻圍噶拉依賊巢等因一摺覽奏深爲欣悅連日兩路將軍馳報得勝捷音賊勢已萬難支禦今阿桂又將附

近賊巢之碉卡寨落五百餘處全行掃蕩已將噶拉依四面圍攻水陸俱斷指日即可擒渠堵穴迅集洪勳實由將軍阿桂等調度精詳機宜悉中用能所向克捷甚屬可嘉所有將軍參贊及領隊大臣各將弁等均著交部從優議敘仍俟紅旗奏捷再沛渥恩○丁丑諭軍機大臣等據明亮等奏河西賊境全已蕩平於噶拉依對河之巴布朗谷密布營卡會擒逆酋富德亦奏占據噶咱爾谷等寨落見與西北兩路官兵會合攻圍賊巢等語覽奏均爲欣慰已於摺內批示至各路番人紛紛投出其中大小頭人俱復不少此等番眾從前抗拒官兵捨死固守情罪均屬可惡直至兵臨巢穴計窮力竭始行投降非若大兵尙未架入以前陸續來投者可比但眾番皆係曾與官兵打仗之人此時難以分其所犯輕重且其抵拒官兵固屬可恨而原其所以捨死堅守尙知各爲其主亦

復可矜況爲數過多又係投降乞命若盡予駢誅實覺心有不忍惟其中大小頭人及其眷屬自不便仍留本處應照前此平定準部時所有台吉宰桑得木齊等繫行移徙例妥爲辦理但須趁官兵未撤時卽爲查明於八旗及吉林索倫兵凱旋之便令其分隊攜帶押至京城再行酌量分別安插伊等旣係投降與黨惡要犯應行獻俘者不同途中不便加以鎖扭惟當留心照料毋致脫逃並當不動聲色勿使驚畏方爲妥善但各種頭人及其眷屬爲數甚眾其如何分別押帶之處卽著阿桂妥爲覈定一面奏聞至各處降番若移於他處編管未免人多費事伊等俱係嫻於耕作之人兩金川又有可耕之地見在凱旋後兩金川地方立汛安營添設提督總兵等官足資彈壓其應辦善後事宜內原有隨處耕屯之議莫若卽用此等降番就所在墾耕安業盡力農功各有將往

管束久之亦可消其桀驁不馴之氣而令其交糧亦省川省運餉之勞惟是編立營屯必須設立頭目當於隨營攻勦之他處士兵內擇其出力者充當既足以示獎勵又令他處之人管理更不慮其故智復萌至此等降番餓乏已久既欲令其耕種自難以枵腹從事著將軍等量爲賞給籽種口糧俾口食有資自更安心盡力將軍等宜及此時早爲籌辦將此由六百里加緊諭令知之阿桂自奏報攻圍賊巢以來距今又閱三日想早應堵穴擒渠大功全歲惟望紅旗卽至○戊寅諭前因御史胡翹元條奏各衙門延請幕友恐日久弊滋定以五年更換並不准延請本省之人及鄰省五百里以內者彼時覺所言似尙有理是以諭令各督撫通行查明於年終彙奏造報以備稽考迄今已閱數年各該省屆期奏報並未實在查出違例延請及逾期不行更換之人可見彙奏一節

不過沿襲具文仍屬有名無實各省幕友在署幫辦事件原不當令其出外交遊結納致滋弊端惟在督撫等董飭所屬大小各員關防嚴密隨處留心自不虞其顧私誼而撓公事若徒定以隔省限以五年而不能實力防閑亦未必卽爲正本清源之法且如劣幕徐掌絲葉木果二案皆係浙人而一在楚省一在滇省相隔不爲不遠仍不免於作奸犯科可見杜弊不係乎限地至幕友如果不使交通聲氣雖年深亦不至於請託舞文設或不能遠迹避嫌卽年淺亦難保無徇私曲法且有馴謹之幕相隨日久尙可資其攸助若因已滿年期另易生手諸事未能卽諳而新延之人亦未必悉皆可信是防微亦不在乎限年嗣後著各該督撫實力整飭稽查如有惡幕招搖生事及劣員徇縱濫交者卽行嚴參究治若督撫袒庇屬員姑容消弭或經科道參奏或別經發覺惟該督撫

是問所有各省年終彙奏幕友之例著停止仍將此通諭知之○
己卯諭前以明季殉節諸臣各爲其主義烈可嘉爰命大學士九
卿等集議予諡所以褒闡忠良風勵臣節也今復思建文革除之
際其臣之仗節死事者亦具載史傳當時永樂一藩臣耳乃犯順
稱兵陰謀篡奪諸臣以大義自矢固當不共戴天雖齊秦黃子澄
輕率寡謀方孝孺識見迂闊未足以輔助少主然迹其尊主鋤強
之心實堪共諒迨大事已去猶且募旅圖存抗詞抵斥雖殞身湛
族百折不回洵爲無慚名教者他若景清鐵鉉輩或慷慨捐軀或
從容就義其致命縱各不同而志節凜然如在下至東湖樵夫補
鍋匠之流姓名卽隱晦不彰其心迹固可追溯也特以永樂殘刻
性成淫刑以逞屠戮之慘極於瓜蔓牽連殆非情理朕讀史至此
未嘗不深憤而痛嫉之雖其中葉少弛厲禁而彼時臣子徇私曲

諱終不獲顯示褒揚使忠臣義士之氣久弗克伸良可憫惻夫以勝國革命之時其抗我顏行者尙念其忠於所事特命表章矧建文諸臣不幸遭內難爲國捐生成仁取義顧可令其湮沒於千百世下耶允宜再集廷議並予易名以發幽光而昭公道其覈實條具以聞○諭都統和隆武左都御史阿思哈副都統和珅著加恩將其一族由各該旗擡入正黃旗滿洲○阿桂豐昇額明亮海蘭察額森特奏賊酋索諾木弟兄及助惡頭人均在噶拉依官寨自必嚴密圍困始可設法俘擒臣海蘭察同福康安普爾普額爾特等帶兵拏卡直至河沿以截噶拉依之右烏什哈達由噶拉依官寨正山駁拏卡下偏近據噶拉依之上臣額森特帶兵攻克喀爾巴寨復將附近噶拉依寨落九處攻克焚燒直至河沿以截噶拉依之左鄂碩覺十寨以南山梁派舒亮帶兵同侍衛訥松額駐

紮臣明亮西岸沿河一帶已嚴密防堵臣阿桂豐昇額復派兵過河於拉古爾對過山巖多設卡座聯絡左手西北兩路官兵俱合其水路復於噶拉依官寨上游趕造浮橋並設卡座巡守至木果木昔嶺等處及鄂碩覺十寨均經一律掃除臣明亮河西一路及富德一路番人俱望風投順見在促浸全境已平惟餘噶拉依巢穴自歸掌握諭本日據阿桂等奏官兵已將促浸全境掃平見在四面攻圍噶拉依巢穴情形一摺深爲欣慰並閱進到地圖賊境礮卡寨落均經大兵勦洗所餘惟噶拉依蕞爾彈丸不及已得之地百分之一自可卽日掃蕩是征勦金川之役已屬蕞功又據稱賊酋索諾木弟兄及助惡頭人均在噶拉依官寨今經嚴密圍困斷難復行軼出便可設法俘擒且索諾木之母阿倉姑阿吉及其姊妹均已來營投降更不虞索諾木等之尙懷觀望所有渠兇黨

惡自必卽行擒縛馳遞紅旗褒績酬勲宜頒渥典將軍阿桂盡誠
體國不憚艱勞制勝運籌克成偉績實爲此事首功前曾賞戴雙
眼孔雀翎並於攻克勒烏圖時賞用紅寶石帽頂茲著加恩封爲
頭等誠謀英勇公並賞四團龍補褂金黃帶以昭崇獎副將軍豐
昇額明亮抒誠勵勇協力宣勞亦堪嘉尚豐昇額本襲公爵復加
賞繼勇名號著再賞以一等子暫令伊弟布彥達賚承襲俟豐昇
額生子後仍令其子承襲布彥達賚見係藍翎侍衛今旣襲子爵
著授爲三等侍衛明亮著封爲一等襄勇伯參贊大臣海蘭察每
遇摧堅奪隘無不鼓勇先登實爲超眾著加恩封爲一等超勇侯
以示優異參贊大臣額森特領隊大臣奎林和隆武福康安普爾
普均各奮勇出力茂著勤勞額森特著賞以一等男奎林本係公
爵著加賞一等男卽令伊子承襲和隆武本係子爵著晉封三等

果勇侯福康安著賞給三等男所有伊原襲伊兄福靈安之雲騎尉著福隆安次子豐紳果爾敏承襲普爾普著賞給三等男豐昇額明亮海蘭察奎林和隆武仍各賞戴雙眼孔雀翎共昭榮獎大學士于敏中自辦理軍務以來承旨書諭夙夜殫心且能鉅細無遺較眾尤爲勞勩其前此過失尙可原恕著賞給一等輕車都尉以示格外恩眷所有此次恩賞世爵世職均著世襲罔替至應予錄敘之將士並各項應予議敘議賞之官員人等及應行諸典禮均俟紅旗馳遞到日再降諭旨○阿桂等奏索諾木之母姑姊妹等均至大營見准其母所請遣隨來之喇嘛噶布則前往噶拉依諭令出降又西北兩路投出番眾見將其大小頭人等派弁兵看守餘除有可疑情節隨時正法外俱分別安插綽斯甲布革布什咱梭磨卓克采從噶克黨壩明正木坪布拉克底巴旺沃克什瓦

寺十二土司地方其各土司又分安各寨有頭人管束且各有冊檔可稽將來卽有另辦之處亦無難查辦諭軍機大臣等阿桂等奏稱索諾木之母阿倉及其姑阿青並伊姊妹帶領從人喇嘛等於十二月二十日到營投降並准阿倉所請差人往諭索諾木出降因母以招其子實亦誘擒生致之機若逆酋等果皆投出自更爲省力佇盼紅旗旦晚卽至又另摺覆奏籌辦投出大小頭人及番眾一節所見亦是卽照阿桂等所請行至捷音到後卽應祇謁兩陵並告功 闕里原擬於謁 陵禮成卽行郊勞再舉東巡見已擇於二月初九日啓鑾爲時甚近將士凱旋未必能如期進至且番境初平其善後事宜應辦者甚多均關緊要亦須阿桂親爲經理方覺妥善今定於謁 陵後卽奉 皇太后聖駕巡幸山東計回鑾約在四月十五以前由寶稼營登陸經南苑新衙門至

黃新莊路亦近便阿桂等於大功告成卽將善後事宜妥爲料理帶領應行郊勞之將佐京兵等酌量日期起程於四月十五日以前至黃新莊以備勞還大典實屬兩便將此傳諭知之○庚辰諭軍機大臣等此次征勦金川將軍阿桂豐昇額明亮參贊大臣海蘭察額森特領隊大臣奎林和隆武福康安普爾普等直抵賊巢各奏功績是以經朕施恩分別賞給公侯伯子男爵寶石頂黃帶雙眼花翎惟參贊大臣富德舒常二人朕並非不施恩澤富德前曾獲咎經朕寬免遣赴軍營理宜感激朕恩奮勉效力而身至軍營駐紮絨布寨二載有餘並無寸進昨雖將庚額特穆谷馬爾邦等處攻取一因接奉飭催之旨再因將軍阿桂豐昇額明亮等已抵賊巢乘其離散之際始有捷獲豈可爲功舒常乃大學士舒赫德之子經朕施恩補放參贊大臣同豐昇額駐紮宜喜一年有餘

並未得進而豐昇額赴凱立葉後伊統兵身駐宜喜惟知株守迨
明亮至達爾圖後方始進兵而屢次將軍摺奏亦未見伊有身先
立功之舉軍營鼓勵將士籌畫機宜責在將軍至參贊大臣理宜
統兵奮勉前進爲眾之表率海蘭察額森特獨非參贊大臣乎且
彼係索倫烏拉齊尙知奮勉打仗舒常身係滿洲世受國恩而反
可臨陣不前乎朕每覽軍營摺奏於將軍等籌辦及參贊大臣領
隊大臣領隊侍衛奮勉之處無不留心卽如朕躬親歷豈有遺漏
之理富德舒常未治其罪仍同眾議敘是卽朕之施恩矣將此傳
諭富德舒常知之○壬午諭阿桂著加恩賞用紫韁○己丑官保
以老病乞休允之以阿桂爲吏部尙書協辦大學士調豐昇額爲
戶部尙書福隆安爲兵部尙書以綽克托爲工部尙書○庚寅諭
吏部堂官見在辦事人少瑚世泰著仍回吏部本任倉場侍郎員

缺著嘉謨補授其漕運總督員缺緊要且正當辦理漕務之時卽著阿思哈馳驛前往暫署候朕另行簡放昨命阿思哈兼署吏部尙書今阿思哈見在出差其吏部事務著永貴暫行署理戶部尙書事務著英廉署理內閣滿大學士亦應有坐辦之人阿桂未到京以前並著英廉協辦大學士事務所有英廉原兼之戶部左侍郎員缺著福康安轉補其戶部右侍郎員缺著和珅補授阿思哈左都御史事務著素爾訥署理綽克托所遺刑部侍郎員缺著阿揚阿補授並著協理步軍統領衙門刑名事務邁拉遜所管事務較多不必署理禮部其禮部侍郎事務著高樸兼署○庚子 皇十二子多羅貝勒永璽薨○諭嗣後王大臣等驗看月官有人缺不相當者酌議對調仍令派出之九卿科道覆看如意見相同卽聯銜具奏請旨著爲令○諭軍機大臣等連日盼望捷音甚切茲

據阿桂等奏見在用礮合擊賊巢約計十天左右即可掃蕩其索諾木彭楚克及大頭人達爾什桑卡爾雅瑪朋阿庫魯三人續經到營見已嚴加拘管等因一摺覽奏稍慰看來賊勢已極窮蹙今既四面用礮合轟自可剋期蕪事至此到營懇求之索諾木彭楚克係索諾木同母兄弟自因其母在營是以來投且前日一見阿倉差往之人卽勸索諾木等出降繼復痛哭今到營跪懇卽求面見將軍並恐回寨不能再出又同岡達克差人回巢催促逆酋投出此兩人尙不敢始終抗拒至達爾什桑卡爾經岡達克再三曉諭尙促索諾木彭楚克速回及詰以把持之罪亦俯首無辭實屬怙終不悛難以輕宥尤宜嚴加拘禁勿致疏虞至逆酋索諾木等始稱於十五日出降繼復託病不出甚屬可惡阿桂等雖稱其爲頭人所制每日遷延然逆酋當此危迫之時如果尙知畏懼亦

何至不能自主卽或丹巴沃咱爾等從中把持亦無難將梗阻之人一併擒縛率眾速出請罪今仍詭語遲延竟是索諾木稟性兇頑至死不變實堪切齒見既用礮轟擊自卽可削平賊巢諒此輩釜底游魂必當同就擒獲檻解獻俘迅速集勦奏凱阿桂見奏期以十日果如所言則二月初九日啓鑾之前尙可望紅旗早至也將此由六百里加緊傳諭知之旦晚惟盼露布馳達

二月甲辰 上御經筵○己酉調富勒渾爲湖廣總督實授文綬四川總督○阿桂奏逆酋將張坤忠送出係屬要犯茲派解赴京諭軍機大臣等張坤忠以內地兵丁甘心投降賊番爲之助惡自應解赴行在嚴審治罪著傳諭文綬卽速檄飭川省委員沿途小心管解遄程行走○庚戌諭 社稷壇之有拜殿原以備致祭之日或有風雨也今年偶值風雨所司移拜位香案於殿中餘仍列

於壇上是朕得獨敝棟宇而神位牲醪並皆露設非所以昭
妥侑朕心深切不安雖社稷之制不設棟宇以承天陽是乃就
壇壝而言至神牌平日原係尊藏神庫未嘗不在棟宇之內
則祭享時偶因風雨移奉殿內又何嫌忌乎且拜殿甚寬想當締
造之初未必不豫爲臨時奉移計止以未嘗經之事所司遵依例
陳設不知所據嗣後祭時或遇大風雨所有神位祭品樂簾應
如何移就拜殿之處著大學士九卿會同太常寺敬謹詳議具奏
尋奏臨祭時如請駕前十刻或值風雨及陰雲太常寺卽將祭品
樂簾移設拜殿恭請神位於殿內致祭如不及十刻仍照舊例
行從之○大學士九卿等議奏遵旨酌擬明代殉難諸臣分別予
諡伏考歷代易名止爲飾終常制而勝國遺忠並膺茂典者實曠
古所未有謹按順治九年世祖章皇帝軫念明末甲申殉難之

臣自范景文以下二十人及劉文炳鞏永固衛時春張慶臻賜諡有差乾隆四年 皇上允廷臣請於明臣趙謨復予旌諡茲奉旨詳議追獎臣等伏讀 欽定明史及輯覽二書詮次釐定義法精嚴蓋自萬厯以降諸臣效節始末具載二書者臣等分析考稽而以大清一統志與直省通志互覈同異至建文諸臣遺聞軼事附會不經表忠致身等錄無足徵據應一以正史爲斷其中區別流品斟酌典章謹擬數條一請臣所處時地不同素行亦不一應定爲專諡通諡之法其生平大節卓然又艱貞自靖者宜特予褒崇按名定諡其平時無甚表見而慷慨致命則彙入通諡之例較著者爲忠烈忠節次則爲節愍烈愍一天啓崇禎間已經議卹者毋庸再給至福王時及唐桂二王雖有贈諡而偏私挂漏臧否益淆應據實綜覈更正一明臣旣邀賜諡宜有所附麗表章應請於各

原籍令有司設牌入祀忠義祠其里居失傳則於授命之所附祀請敕下翰林院撰議專諡通諡文各一篇交禮部刊發直省令所在如式造木榜填書某官姓名諡字載事實於後懸祠內其後嗣願於祠墓立碑者聽其闕門遇難者應入祀節孝祠一諸生韋布甚至姓名無考如山樵市隱遂志成仁諡所不及應均入忠義祠其有妻女同殉者如前例一明臣如所修王大年李應薦張捷楊維垣輩雖臨危不屈而名歷閣黨不便濫邀諡典其因馬士英驟遷如楊文驄抗節可矜進身究可議若方岳貢邱瑜殉難見於一統志以正史律之則有遺憾而一時勳戚之臣明史謂大半以兵死者原不在盡節之數又如張鶴鳴之排熊廷弼蘇觀生之構難桂王皆憤事可誅而馬吉翔蒲英表裏爲奸其入籍偕亡益無足道且有於甲申謁賊苟免後乃堅拒王師如傅鼎銓張家玉衛允

文吳爾壘者均屏而不錄至樓璉草詔而後自經梅殷入朝而復
遇害亦不得比於完節一明史久經 欽定頒行謚法難於各傳
添載請照明史格式另編一冊冠以原奉諭旨次載諸臣議疏及
所擬專謚通謚清單一體成書與明史相輔而行又議駁左都御
史張若淮奏請交直省督撫採訪明季殉節事蹟伏查文集說部
原非一無可據然若李國楨誤國辱身而谷應泰紀事本末乃謂
其激烈殉義吳紀善降賊被殺而吳偉業作傳乃稱其大罵捐軀
此等亦復不少且有文獻無徵而僅據其子孫呈報之詞又將何
所考覈以辨其誣信况天下之節義一也 皇上褒崇獎卹原主
於扶植綱常卽間有未發之幽潛亦無不正氣咸伸漏泉同感所
奏應無庸議諭大學士九卿等將明季並建文時殉節諸臣悉按
史乘覈查擬予專謚通謚及應入忠義祠者分冊具奏甚爲允協

著照所議行其進呈各冊於姓名事實摘具梗槩頗見詳備著名
爲勝朝殉節諸臣錄交武英殿刊刻頒行卽以原頒諭旨錄冠卷
首仍附載廷臣所上議疏朕特製詩篇題識簡端用以垂示久遠
至大學士等議覆張若淮奏請勒限訪查一摺所駁亦甚是張若
淮固爲善善從長之意但見在廷臣等考覈釐次以明史及輯覽
爲據旁及一統志及各省通志參互考證其仗節死義者已有三
千六百餘人是因世近可徵而朕加恩訪錄已迥非漢唐宋諸朝
所可及不可謂不多今旣各加旌典俾得共與闡揚於崇獎忠貞
風勵臣節之道已無遺憾卽使再加蒐採亦未必能廣至千人於
此事全局有何增益而稽諸文獻無徵之餘必至眞僞混淆轉不
足以昭傳信且恐有司詢訪不免於胥吏輩藉端滋擾里閭更非
朕軫恤遺忠之本意此事亦著照所議無庸辦理併以此旨及議

駁奏備載卷首仍將此通諭知之○諭向來養心殿太監等遇有一應零星活計輒傳喚造辦處各項匠役整理漫無稽覈殊屬非是圓明園等處亦然宮殿重地豈容外人出入卽有應行修整之事亦應告之總管內務府大臣等派員放匠不得任聽太監等專擅徑行昔 皇祖時曾有 諭旨飭禁載在宮史今相沿日久太監等又復漫無顧忌不可不實力整頓著交總管內務府大臣將太監傳喚匠役進內之事嚴行禁止嗣後如有必須放進修整活計之事俱令呈明該總管大臣派員查點仍將某處放進次數於年底彙摺具奏○辛亥 上啓鑒謁 東陵○以祗謁 兩陵並巡幸山東免經過地方本年額賦十分之三○壬子命各部堂官察覈俸滿截取知府人員並司員改補御史俱不得擅行奏留○

甲寅 上謁

昭西陵

孝陵

孝東陵

景陵詣

孝賢皇后

陵奠酒回鑾○阿桂豐昇額明亮奏臣等督兵將噶拉依賊巢合力攻圍其官寨外扎木什克各寨尙在死力拒守臣等晝夜督攻初三日望見扎木什克寨內及各寨賊眾情形散亂臣海蘭察額森特均卽帶兵直下臣富德舒常亦帶兵過河賊人出寨跪降所有各散寨均經官兵占據並將官寨東取水之處占斷是晚各至官寨墻下圍定賊人叫稱索諾木明日出降至初四日早索諾木跪捧印信帶同兄弟並伊妻及其大頭人喇嘛大小頭目二千餘人出寨乞免誅戮伏查金川賊酋窮兇極惡爲西南邊外之患今悉就擒俘而助惡頭人無一倖脫除將賊酋賊目遵旨檻送京師其家屬大頭目喇嘛等陸續起解外謹將武功全葭恭馳露布奏聞諭軍機大臣等今日正當祗謁 東陵告功回桃花寺駐蹕適阿桂等所奏紅旗遞到此實仰賴 皇祖默佑是以捷報不期而

至朕回鑾至圓明園卽起程展謁 西陵禮成恭奉 皇太后巡幸山東告成 闕里計四月二十六日至黃新莊於二十七日舉行郊勞大典著傳諭阿桂令其約計程期在軍營起身與豐昇額海蘭察額森特福康安普爾普等同來至明亮擬授爲該處將軍毋庸來京並著阿桂於富德舒常內酌留一人同明亮辦事其餘領隊大臣侍衛等應帶何人同來應留何人分帶後隊凱旋兵丁並著阿桂酌定此次平定金川實皆阿桂一人功績深堪嘉尙茲班師在邇特解親御墨狐駁黃馬褂先行隨報賞賜○乙卯諭將軍阿桂等奏報攻克噶拉依賊巢逆酋索諾木及其弟兄莎羅奔甲爾瓦沃雜爾斯丹巴併兩土婦及助惡之大頭人丹巴沃咱爾阿木魯綽窩斯甲尼瑪噶喇克巴等悉行擒獲金川全境蕩平武功耆定馳遞紅旗隨摺奏賀披覽深爲欣悅前因兩金川以內地

土司敢作不靖暴侮鄰疆初以齟齬相尋乃番人常性不值勞師遠涉屢經該督提誠諭斂輯乃野性難馴反覆違約甚至狼狽爲奸負恩反噬非復可以口舌化誨此而不懾以兵威大示懲創則懦弱之士司幾無以自存且逆番平日有搶至維州橋之謠若聽其鴟張肆橫久之必至擾及內地何以綏靖邊圉惟當埽滅叛番以圖一勞永逸否則後患滋深此朕數年來不得已而用兵之苦心也茲將軍阿桂統率將士不憚艱勞殫心謀畫我八旗勁旅奮勇爭先漢土各兵有所效法亦皆踴躍用命屢建殊勳兩金川之地隨以次蕩平逆酋兄弟及黨惡之大頭人等見皆擒獲俘獻露布馳聞大功全藏從此卽於其地設鎮駐兵番境甯謐各土司得以永慶安全此皆仰賴 上蒼默佑 宗社鴻庥朕喜慰之餘倍深敬畏朕見在祇謁 雨陵禮成後恭奉 皇太后巡幸山東告

成 闕里計四月二十六日回鑾至黃新莊並諭將軍等率凱旋
兵眾如期而至卽於二十七日舉行郊勞之典翌日獻俘 廟

社並御午門受俘所有一切事宜及功成應行典禮著各衙門查
例具奏並將武成原委宣示中外知之○諭軍機大臣等據劉秉
恬奏促浸水源來自松潘口外經過從噶克黨壩而入其境水勢
頗覺深闊攢拉之水發源於孟筆山巴朗拉等處水源不遠水勢
亦比促浸較小兩水均係自東北而趨西南至明正司所轄之章
谷地方匯而爲一等語該二處水源大小不同而所趨方位均在
西南據稱至章谷地方匯而爲一之處是否無誤並此水見係何
名下流究歸何處其境距川省內地不遠所有水名及水勢源委
自無難確勘而知查一統志載甯遠府屬有若水源出西番至會
理州西與金沙江合亦名瀘水今劉秉恬摺內所稱促浸攢拉二

水會歸之處是否卽係瀘水與金沙江合流抑係別爲一水著文
綬桂林確查具奏再據劉秉恬奏稱該處臨河一帶可以開礦採
金是以一則呼爲金川一則呼爲小金川等語該處雍中喇嘛寺
見有大金頂則產金自屬不妄若果產金沙恐該處眾番及內地
奸民前往偷採聚眾滋事自宜嚴查飭禁設金沙果多又不如官
爲勘驗試採之爲愈今兩金川之地見議設鎮安營此等事宜亦
總督提督所宜留心辦及者並著文綬桂林詳細查明妥酌具奏
將此一併傳諭知之○丙辰諭此次平定金川大功告成自應照
從前平定準噶爾回部之例於紫光閣圖畫功臣像掄其功績最
著者爲前五十功臣朕親製贊並錄其較次者爲後五十功臣著
大學士于敏中等擬贊紀實銘勳用昭褒寵前此以大學士忠勇
公傅恒居首此次殫誠宣力百戰成功實惟將軍阿桂一人之力

自應列爲首功其餘將佐候朕另行定次至隨朕辦理軍務之軍機大臣五載以來始終其事者如大學士于敏中承旨書諭倍著勤勞尙書公額駙福隆安夙夜在公克宣勞績大學士舒赫德於此事雖未全行承辦而勦捕臨清逆匪實屬可嘉並著一體畫入前五十功臣像以示覈實酬庸之意○諭軍機大臣等前據護理阿桂奏金川設立營鎮各條酌擬提督駐美諾並於噶拉依添設總兵勒烏圖添設副將此時正當辦理善後事宜阿桂自應籌及四川提督見係桂林止須令其移駐其副將一缺亦可就內地簡僻營分酌量惟總兵一缺或於內地各鎮內擇其事簡者量爲裁減移設噶拉依而其人則揀在軍營勞績最著明幹能事者酌量調補若內地鎮缺難於裁併卽添設總兵一員亦無不可此事著阿桂會同文綬熟籌妥議具奏至新設將軍原議駐紮雅州將成

都副都統一缺議裁今思各省駐守將軍俱有副都統協同辦事其成都副都統自應仍留駐紮省城所有額兵二千名酌量一半在成都同副都統駐守止須移一千名隨將軍在雅州鎮守於體制既合卽移建兵房等事亦較爲省便阿桂自必以此說爲然著詢之阿桂令其將作何移改之處一併妥議具奏又將軍駐紮雅州原爲番地初定新設營汛資其控馭彈壓是以令將軍節制綠營將軍每年自應至金川新設營分巡查一次並當巡閱成都駐防之兵副都統亦當每年往來巡歷一次二三年後則令將軍移駐成都副都統移駐雅州尤爲妥協已交軍機大臣存記至期再行題奏請旨將此由六百里傳諭知之○以達敏爲禮部右侍郎

由內閣學士遷

○調廣德爲廣東按察使陳用敷爲廣西按察使○丁巳

上還宮○命嗣後八旗孀婦孤子雖有伯叔兄弟而或係兵丁

或武職不過前鋒校等官文職僅筆帖式不能兼顧者俱給養贍

○戊午 上啓鑾謁 泰陵○賞故直隸總督方觀承之子維甸

內閣中書准一體會試○命優敘隨征金川得功將士○己未諭

軍機大臣等此次平定金川會降旨照前此平定準噶爾回部之

例圖畫前後五十功臣像於紫光閣並經軍機大臣酌擬諸臣名

單進呈其不敷人數行令將軍阿桂酌量增添移改並註明事實

確覈具奏但前次圖畫功臣曾將準部之薩喇爾等回部之霍集

斯伯克等數人並列此次軍營隨征之各土司頭人內頗有竭誠

效力奮勇著績者自應甄錄圖形以昭盛典著傳諭阿桂令於在

事各土司掄其功績較著者酌擬二三人列入前五十功臣並於

頭人內擇其奮勉出眾者四五人列入後五十功臣一體註明事

實略節覈實奏聞○諭據桂林奏前經將軍阿桂奏交詳查富德

東華續錄 卷八十三

所奏扣罰土兵鹽菜銀兩充抵賞需一案調取各站員支收底案並管理土兵員弁扣罰檔冊逐一查對復將該員弁隔別詢問皆與富德原奏多有不符查富德原以節省帑項爲詞今覈其節省之法一則將巴旺例不應支之項冒支一則將明正例不應扣之項濫扣並非實有節省並訪知富德一路所有賞需過多除由省中調取綹段布匹煙茶及軍營辦買牛羊燒酒等物值銀一萬九千餘兩復向隨營糧員取用銀一萬一千餘兩因慮及事後追賠急欲設法彌補遂將土兵不應支扣糧銀展轉扣罰又恐私下抵還難免物議是以奏明補交二千之外又暗繳銀一千兩假節省之名償其過用之數則富德添用土兵似已先存借此彌補之心等語此事實出情理之外富德爲人小氣其沽名市惠遇事取巧固朕所深知且其屢次奏摺常將賞給兵丁之語附奏焉知不豫

爲開銷地步軍營賞項自有節制卽如阿桂一路弁兵屢立戰功
尙不見其多有賞賚富德並未寸進何獨於兵丁動輒多賞卽使
所賞屬實而格外濫賞又擅行違例支扣彌縫已有應得之罪若
更藉名賞用而與所賞之人暗地分肥則其罪更不可追今所取
用支扣之項俱有案冊可查已無疑義至其每次所賞何人賞用
何物計共需銀若干均無難查訪覈實富德曾獲重譴復加恩棄
瑕錄用卽或所至立功而有冒濫侵肥之事尙不能相抵況此次
並未著有勞績若此案查有情弊則其罪由自取更不能稍爲寬
貸矣又桂林摺片奏總兵英泰向隨富德軍營辦事此案原委自
所深知卽富德原奏亦有公同商議之語乃面詢該鎮但含混其
詞不肯實告而詢之管理土兵守備李瑞王朝貴堅稱扣罰俱係
隨時稟交該鎮均經該鎮諭令轉交都司陳維輝存貯並註明檔

冊復據陳維輝稟稱此項銀兩收發俱同明英泰今眾證確鑿該鎮猶一味含糊希冀置身事外殊屬巧詐不堪且恐其中不無另有別情等語英泰經手收發之處既已取供僉同自難諉爲不知或與富德通同舞弊亦未可定均不可不徹底清查著交阿桂豐昇額明亮會同文綬富勒渾逐一秉公查覈務得實情如有應革職審訊者一面辦理一面奏聞看來桂林此奏未必有虛假之處今派令阿桂等會同該督等查審自無難水落石出但朕知阿桂素與富德不和而豐昇額之父阿里衮更與富德不和若僅交阿桂等審辦恐無識之人妄謂阿桂藉此事洩忿而豐昇額等不免隨聲附和轉無以服富德之心因派袁守侗前往會同查辦其有應行提訊之人應得查覈之案阿桂等可先行提齊查辦俟袁守侗到川省公同定案計袁守侗到四川省城時阿桂等亦可回成

都公同查訊此案尙可以不誤將軍等凱旋郊勞之期至袁守侗與富德素非交好自屬空空洞洞不肯稍存瞻徇若富德果無情弊阿桂等自無從加以深文如或情真罪當袁守侗亦不能稍爲開脫其是非曲直俱難逃朕之洞鑒朕惟一秉大公從不豫設成見阿桂等皆所探悉並將面諭此事原委令袁守侗見阿桂等時傳諭更可得其中詳悉矣將此由六百里加緊諭令知之桂林摺並著鈔寄閱看○庚申命勘丈甯夏廠地聽民墾種○壬戌 上

謁 泰陵○癸亥諭據裴宗錫奏石阡府知府洪彬由刑部司員俸滿截取以簡缺知府用該員才質中平辦理地方公務每形竭歷難勝表率之任請給咨赴部引見可否以府佐降補恭候欽定其石阡府員缺歸部另選等語所奏甚是著交部照例辦理各部郎中員外俸滿截取知府令該堂官酌量堪勝繁簡分別出具考

語保送引見其不勝外任者卽聲明留部原屬慎重甄別之意乃相沿日久各堂官率徇情取悅以繁缺保送者多而簡缺及留部者少昨經降旨申飭今裴宗錫適有此奏可見各部堂官保送之不能公當矣簡缺與不勝外任相去止差一閃該堂官遇司員才具平庸者送以簡缺計圖掩飾其短殊屬非是向來各部保送人員遇有貪黷敗露原舉之堂官考成甚重而簡缺選用人員或有不堪勝任者該堂官向無處分遂不免於任情濫舉嗣後各部保送簡缺知府經督撫奏其不勝方面之任者其原舉之堂官咎無可辭雖不必如濫保貪員之重亦當予以議處俾知儆惕其應如何酌定之處著該部詳議具奏備督撫因有此旨輒瞻顧原保之堂官情面遇簡缺知府之庸劣者曲爲姑容不能如裴宗錫此次之據實陳奏則督撫等之獲戾甚大一經查出或經科道糾參必

將該督撫重治其罪斷不能如尋常過失之得邀從寬留任也朕辦理庶務每事必求其至當如此一事諭吏部定濫保之堂官處分卽防各督撫之不免看情護庇不使稍滋流弊於此可見爲君之難著將此通諭知之○甲子諭文職漢大臣由鼎甲出身者向無賞戴花翎及賞黃褂之事大學士于敏中於辦理金川軍務承旨書諭倍著勤勞昨因大功告成特沛恩綸畫入紫光閣功臣像與其餘詞臣不同著加恩賞戴花翎並賞黃褂以示優眷○諭昨日三寶題旌烏程縣女子沈二姑一本據稱沈二姑係山東壽張縣已故知縣沈齊義次女在浙江原籍因聞伊父在壽張縣殉難卽寢食俱廢嗣家屬同浙得知確音投繯殞命具題請旌已批交該部議奏矣但所稱忠孝萃於一家之語殊未允當沈齊義身任地方值逆匪肆擾不能立時撲滅反露消息賊聞而起變以致失

城劫庫設使該員尙在必當重懲其罪特因其一死予以卹典已屬加恩豈可謂之忠沈二姑聞父死難卽絕食投繯雖弱質捐生情殊可憫然葬祭以禮乃孝之正道若皆以死殉父則其親身後之事付之何人是以毀不滅性禮經重戒男子尙然況女生外向又豈可以輕生教孝乎若沈二姑之死照一門殉難之例旌其義則可旌其孝則不可忠孝二字關繫綱常名教者甚大非一端一節可以冒稱覈實循名未便輕於假借著將此通諭知之○命巡幸仍進閱本著爲令○乙丑諭原任大學士劉統勳宣力年久每繫朕懷其子劉墉學問尙優人亦似有出息茲服闋來京著以內閣學士遇缺卽補見在胡高望出差員缺卽令其署理仍著在南書房行走○諭于敏中旣賞戴花翎並賞黃褂伊兒係大學士且與大學士舒赫德尙書公福隆安同列紫光閣功臣畫像三人翎

頂自應畫一于敏中著加恩賞戴雙眼翎○以示信爲內閣學士

由光祿寺卿遷

○丙寅

上以翌日巡幸山東恭迎

皇太后鑾輿駐蹕

新衙門行宮○定外任內升人員原任內因公處分分別年限令

該堂官及原任督撫注考送部例○改雲南騰越協副將爲總兵

龍陵營遊擊爲副將○丁卯 上奉 皇太后啓鑾巡幸山東○

己巳免直隸通州等二十八州縣廳未完地糧倉穀○庚午免直

隸霸州等二十一州縣未完地糧倉穀○辛未廣直隸本年學額

○減直隸軍流以下人犯罪○是月督理糧餉吏部侍郎劉秉恬

奏奉旨審定番音金川名爲促浸小金川名爲儂拉查乾隆十二

三年平定金川方略內已書金川小金川字據臣民亦共知之其

知促浸儂拉二名者惟在事臣工數人若以之纂入方略不免轉

生疑議應請照舊書寫或改寫促浸儂拉於首卷總敘番地名目

說一篇內得旨自應如此

三月癸酉諭軍機大臣等朕奉 皇太后安輿巡幸山東告功

闕里並謁 岱廟祝 釐先期屢諭地方官沿途毋事點綴繁文

侈爲觀美連日經過直隸水程凡有村落之處綴景未免太多至於戲臺尤屬無謂御舟恩恩一過何暇留覽而徒爲此無益之糜費乎且既有豫備村民聚觀迎迓者必多朕不得不出坐船頭聽其瞻仰轉妨船窗觀書吟詠之功止覺其煩勞而不覺其可樂已命軍機大臣諭知周元理量爲減省直隸旣已如此恐山左聞之更爲踵事增華與朕省方觀民之本懷不相左乎著傳諭楊景素務須善體朕心若本末備辦固屬甚善設或偶有點綴亦不得過多可減者減可停者停勿負朕諄切告誡之意○甲戌諭河東河道總督姚立德自獲咎以來將及二載著加恩賞還頂帶○乙亥

諭軍機大臣等據阿桂奏查明富德在馬爾邦等處所戮番眾僅止三十六人其捏稱三百四十餘名之語係富德分付書辦邱宏道令告知英泰照辦以圖熱鬧英泰卽曲爲承順照所言具稟等語富德性喜造作諸多不實朕素知之乃英泰竟與之朋比爲奸實屬不堪然此一節尙其罪之小者至其妄報賞賚兵丁多取銀段等物並將土兵鹽糧銀兩冒支濫扣充抵賞需等情其中侵冒分肥皆所不免果爾則富德與英泰之罪甚重已差袁守侗馳往會同阿桂等查訊如查明侵冒實據卽將富德英泰一面革職嚴訊一面奏聞著傳諭阿桂等卽遵照前旨據實審究迅速覆奏務使水落石出以成信讞此一節並諭袁守侗文綬富勒渾知之又阿桂等覆奏三路節次投出番人二萬有零分別賞給各土司等因一摺亦止可如此辦理前因促浸番眾黨助逆酋抗拒天兵甚

爲可惡曾諭軍機大臣存記俟大功告成時提奏將此等曾經抗拒至勢窮力竭始行投出之賊番查明分發伊犁黑龍江等處安插彼時因伊等頑梗情形實堪切齒故欲示以嚴懲今促浸巢穴既已掃蕩逆酋逆黨悉就俘擒其事業已辦完而此等番眾分賞各土司並分別安插其勞已散而作惡之頭人俘戮已盡更無虞其日久滋事且分賞土司之人並經伊等養贍難以復行追同至各土司隨征打仗傷損精壯男番頗多今所賞之人尙不足以抵補其所損之數此等番人卽照阿桂等所奏辦理無庸另行查辦將此由六百里諭令知之○丙子諭山東巡撫楊景素前已賞戴花翎著加恩賞穿黃褂○丁丑免山東泰安曲阜二縣本年額賦○戊寅諭吳紹詩前在吏部侍郎任內因老病乞休准以原品致仕今朕巡幸山東吳紹詩恭迎道左召對時見其精神尙好且係

曾經出力之人著加恩賞給尙書銜○命外任升授京職人員督撫卽於咨文注考送部因公革職者亦如之○免山東鄒平等三十九州縣衛各項民欠○己卯 上奉 皇太后至德州登陸○增設四川成都將軍以明亮爲之○庚辰廣山東本年學額○阿桂奏查土婦扎什納木前於壩蕩噶拉依時投出伊子諾爾布湛都爾實爲該處頭人番眾歸心所有革布什咱土司應令承襲其土司印信先爲金川奪去見於噶拉依官寨內創得當於二十七日陳設印信傳集扎什納木母子並革布什咱頭人宣示諭旨令其祇領該土司母子感激流涕各土司見之無不咨嗟悅服報聞○辛巳諭軍機大臣等昨授明亮爲成都將軍節制綠營控馭番地已明降諭旨矣該處所以設將軍之意原因此次逆酋抗拒不法皆由歷來地方官釀成向來管理番地各員於土司漫無經理

惟附近之明正土司等數人引而親之加以禮貌其餘則皆視同膜外眾番已久懷不平且於軟弱者縱胥吏肆其魚肉而於強橫者畏如虎狼益爲番眾所輕遂至毫無忌憚歷任總督如開泰阿爾泰又皆無整理之能畏葸貽誤卽從前莎羅奔耶卡之事亦未必非彼時督撫之優柔畏事積漸而成今費五年之力十萬之師七千餘萬之帑始能將兩金川削平埽穴俘渠用申國威而肅法紀茲議於其地安營設汛移提鎮大員統兵駐守並添設將軍駐邊彈壓固足以震懾諸番但所設之將軍若不委以事權於地方文武不令其統屬考覈仍與內地之江甯浙江等處將軍無異尙屬有名無實且番地事宜仍由地方文武辦理僅稟知總督而行而將軍無從過問非但呼應不靈卽於綏靖蠻貊之體制亦不相合見在文綬爲總督明亮爲將軍自不虞有所掣肘若將來接任

之員或彼此稍存意見卽不能資和衷任事之益且恐不肖員升久之故智復萌不免仍蹈前轍尙不足爲一勞永逸之計此乃善後事宜之最切要者不可不及早酌定章程俾永遠遵守自應令成都將軍兼轄文武除內地州縣營汛不涉番情者將軍無庸干與其管理番地之文武各員並聽將軍統轄凡番地大小事務俱一稟將軍一稟總督酌商妥辦所有該處文武各員升遷調補及應參應訊並大計舉劾各事宜皆以將軍爲政會同總督題奏庶屬員有所顧忌不敢妄行而番地機宜亦歸畫一若日後將軍或因事權專重擅作威福擾及地方干與民事者總督原可據實陳奏又或總督輕聽屬員之言於番地情形動多牽掣致誤公事者將軍亦當據實奏聞朕惟按其虛實秉公覈辦以定是非必不肯有所偏向其應如何酌定章程之處著阿桂等於回至成都時會

同明亮文綬桂林悉心妥議具奏至各土司內宣慰司宣撫司安撫司招討司等職其每年輪班入覲時應作何按次輪派並聽將軍覈定會同總督提督料理送京至該土司等到京後應照年班回部之例歸理藩院管理使土司頭人各遂其瞻仰之情承受恩澤倍加榮耀其土司襲職等事亦由將軍總督咨報理藩院辦理所有應行事宜並著阿桂等一併酌定具奏將此由六百里加緊傳諭知之仍將酌定章程各條迅速覆奏○壬午免山東德州等十一州縣緩徵漕米漕項○癸未以吳嗣爵署吏部侍郎薩載爲江南河道總督楊魁爲江蘇巡撫○給兩金川降番籽種牛具准三年後照屯練納糧○甲申召勒爾謹來京陛見以畢沅署陝甘總督富綱署陝西巡撫○以圖桑阿爲江西布政使李本爲甘肅按察使

由四川驛傳道還

○丙戌

上至泰安府謁

岱廟

○諭朕前歲

閱視河工臨蒞天津督撫等有遠道進貢者曾降旨通諭飭禁茲因平定兩金川巡幸山東告成闕里各省督撫呈遞貢物者甚多殊屬無謂朕鑾輅所經如本省大吏呈進方物尚非過分卽各鹽政關差織造閒進紬段等項以備賞賚亦尚有因乃各省督撫竟率相遠致皮張段匹等物爲誇多鬬靡之舉朕非但不喜且覺其煩瀆可憎封疆大臣朕委任以地方政務惟視奉職程其殿最豈因進貢衡其短長伊等何不知善體朕意冒昧若此乎所有此次各督撫呈進之物已諭令奏事處槩行擲還仍著傳諭申飭嗣後遇朕巡幸務恪遵此諭毋得復有進獻將此通諭知之○諭彭啓豐曾任尙書學問亦優其緣事降調尙無大過後因衰病於京察時以原品休致今伊遠自蘇州前來接駕著加恩賞給尙書銜○軍機大臣議定西將軍協辦大學士尙書公阿桂等奏會商兩

金川善後事宜一明正木坪等土司見令於本年冬季進京統俟各土司入覲後再照回疆例定以年班應令將軍明亮等妥爲酌派以均體恤一原議將軍駐紮雅州但將軍總督兩地相懸遇緊要番情不獲立時商推並勘明雅州城地勢偏仄滿兵難於挹眷宜令將軍仍駐成都一原議提督移駐美諾查美諾仍在各土司境地東界其距夔州川北永甯均已寫遠於專轄內地綠營事宜多所未便綠營兵散布居處與滿營不同應於雅州拓城建房令提督移駐卽交桂林韓辦一泰甯協副將移駐打箭鑪改阜和協兵額照舊分協標左右兩營阜和營遊擊移駐化林坪改泰甯兵額亦仍原數一原議增添滿兵一千今將軍副都統同駐省城兵額止應仍舊一促浸共安兵三千名於勒烏圍設總兵一遊擊一都司二守備二駐兵一千噶拉依設副將一都司二駐兵七百噶

爾丹寺設遊擊一守備一駐兵三百茹寨設參將一守備一駐兵
四百馬爾邦設遊擊一守備一駐兵三百曾遠設守備一駐兵三
百儼拉共安兵三千名於美諾設總兵一遊擊一都司二守備三
駐兵一千底木達設都司一駐兵五百大板昭設守備一駐兵三
百僧格宗設參將一守備一駐兵五百翁古爾壘設守備一駐兵
三百約咱設都司一駐兵三百明正章谷原設防兵添足一百名
酌派千把一員駐防至儼拉促浸地土瘠薄今授田伊始應將兵
三人給地畝一分令兩人當差一人耕種建昌松潘維州等處兵
願挈眷來居者官爲咨送初至給鹽菜口糧俟墾種已成停止再
有餘地於雜谷腦五寨屯兵內移駐並於維州保縣來營貿易番
人內招墾其家眷照例給費遷徙兵缺出卽於番人內募補並一
體酌給牛具籽種再番地房屋不能經久應令分建碉寨居住鹽

茶布棉等項每年官爲辨運定價銷售其屯種收糧等事於同知佐雜內派委分駐經理三年更換實心奮勉者奏升見在邊外各土司係松茂建昌道所屬應卽令該二員赴口外經理一應設官兵每年所需鹽菜銀應照原議於江浙等省酌裁名糧以符其數俟番民樂業後再行酌減均如所奏諭軍機大臣覈覆阿桂等議奏兩金川善後事宜摺內所有番境應設綠營兵六千五百名歲需屯墾鹽菜銀七八萬兩請於江蘇安徽浙江江西湖北山東河南山西等腹內省分酌減名糧抵補一款尙未妥協朕平定兩金川不惜七千餘萬帑金原爲綏靖邊圉一勞永逸之計何靳此七八萬鹽菜之需況江浙等省營分雖居腹地亦有差操防汛之事若酌減名糧於各該省兵丁生計殊屬有礙自可無庸裁減所有川省歲需屯兵鹽菜之費著該督文綬卽於正項內動支至番地

初定新設營汛全資將軍控馭彈壓自應令將軍每年至兩金川
新設營分巡查兩次副都統亦當每年巡查一次將所有滿兵輪
派隨往庶駐防兵丁常得演習勤勞卽綠營官兵亦知所觀法餘
依議○丁亥 上登泰山○戊子賜山東及各省召試諸生黃道
暉等三人舉人舉人賈汝翼等二人內閣中書○辛卯諭戶部尙
書王際華才品端謹學問優長久直內廷簡任部務懋著勤勞邇
年承辦四庫全書及舊要事尤爲殫心經理且年甫六旬正資倚
畀今聞其因痰湧暴厥醫治無及遽爾溘逝深爲悼惜著加恩晉
贈太子太保並派散秩大臣一員待衛十員前往奠醊其各任內
革職革任之案俱准開復所有應得卹典仍著該部按例具奏尋
予祭葬諡文莊○以袁守侗爲戶部尙書吳嗣爵爲吏部侍郎○
免四川通省上年額賦及本年夷賦有差○乙未 上至曲阜謁

先師孔子廟○丙申釋奠 先師孔子告平兩金川功○丁酉

上謁 孔林○謁 少昊陵 元聖周公廟行禮○諭前歲初

聞木果木軍營失事之信以溫福倉卒遇變臨陣捐軀特加恩賞
以世襲伯爵嗣查明木果木之事溫福既未能措置豫防及被局
被劫復將營門關閉遂致民散兵潰是溫福之乖方僨事死由自
取豈可復膺五等之封是以將所賞伯爵革去但念其究係陣亡
仍令該部照例議給世職卽令伊子永保承襲茲因平定金川將
軍阿桂等查明木果木一案通信勾結七圖甲噶爾思甲布實爲
罪魁因命解至行在交軍機大臣審訊據供初投誠時派在控喀
打仗有伊叔小金川頭目七圖安堵爾差經朋來營約令叛回初
時因官兵勢眾未敢應承後見將軍將後路防兵調去止贖番兵
看守從察斯木翻過山頂地名登達達到勒烏圍止一天路可以

繞道通信遂句通各番寄信索諾木等統賊分路潛出先害董天
弼次劫溫福約計辦了兩箇月方乘隙滋擾等語則其事全係溫
福釀成七圖甲噶爾思甲布係小金川助惡頭人七圖安堵爾親
姪乃溫福並不查察留於軍營又不加意防範竟聽其假稱投降
句賊內應商謀兩月之久奸細往來送信出入自由溫福毫無見
聞直如木偶已屬不成事體且據七圖甲噶爾思甲布供察斯木
翻山卽是登達達到勒烏圍止一天路該處既有此捷徑溫福當
昔嶺阻遏之時卽應留心偵訪閒道疾趨出其不意直抵勒烏圍
大功早可告蒞乃坐擁重兵守株待斃轉留此路爲賊人通信搆
謀是木果木之挫失全係溫福之坐昧事機所誤使其尙在必將
伊立寅重典今旣已身死卽屬倖免豈宜令其濫邀世及之恩所
有此案議卹溫福世職卽著撤銷至伊子永保等各本身原有官

職仍准其照舊當差此卽朕格外加恩罪人不孥之意伊等益當感激奮勉以贖父愆朕於軍營功過信賞必罰悉視其人之自取從不肯絲毫假借如溫福之失律貽誤若令其冒濫叨恩又何以示勸懲乎著將此通諭知之○諭吳虎炳奏於二月初二日到廣西巡撫任後查有革職道員秦廷基因袒護屬員授意改供擬斬監候係旗人應行解部監禁之犯尙未起解當經飭催據報患病調治嗣據署臬司黃邦甯面稟該犯在監病故隨率同司道等親往相驗秦廷基實係生前自縊身死並非病故並訪知該犯原寓省城邊耳巷張姓公館內並未收監扭鎖以致在寓投縊黃邦甯於該犯死後連夜擡入司監各情節請將署臬司黃邦甯司獄宋紱一併革職審擬並自請交部嚴加議處等語覽奏殊堪駭異實爲從來未有之事秦廷基係問擬斬候應行解京監禁要犯黃邦

甯署理臬司膽敢瞻徇同寅情面任聽安住旅館托病延挨不卽起解已屬玩法及秦廷基自縊復敢捏稱在監病故移屍獄中希圖掩飾其情罪尤屬可惡黃邦甯著革職拏問該撫卽派委委員速行押解赴京交刑部從重治罪至此案係熊學鵬任內之事熊學鵬既將秦廷基授意改供審訊屬實擬以斬候自應一面具奏一面將秦廷基照例收監乃自十一月二十一日定案後任聽其在省安居並不卽行收禁致該犯得以在寓投繯其事實由熊學鵬釀成况秦廷基袒護改供一案熊學鵬近在粵西並未查出參奏難保無徇情曲庇之處直待李侍堯秉公參劾熊學鵬乃不得不嚴行定擬其隱微已不問可知朕以熊學鵬素常辦事尙屬勤慎小心是以調赴粵東大省竟不料其荒唐一至於此實爲孤負朕恩朕於督撫等公過處分應行降革者槩予從寬留任今熊學

鵬敢於違例寬縱係屬私罪難以曲爲原宥熊學鵬卽著革職發往川省辦理軍需奏銷事務其軍營各員所有虧短官項如溫福遺失銀米等款若力不能完者卽著令熊學鵬賠補以爲督撫徇情沽名者戒至司獄宋紱雖係專獄之員但將秦廷基擡屍入監一節出自署臬司黃邦甯之意該司獄以微末屬員其力自不能違抗予以革職已足蔽辜毋庸審訊治罪吳虎炳到任未及一月卽將秦廷基應行解部監禁之處飭屬嚴催並將黃邦甯捏報監斃移屍入獄各情弊查出據實參奏頗屬認真辦事其失察秦廷基原未收禁之處尙可從寬吳虎炳無庸交部議處又據蘇爾德奏身任藩司近在同城不能早爲發覺請一併交部議處等語蘇爾德若止係藩司監獄之事與伊無涉原可無庸置議但熊學鵬於正月初十日起程赴粵東新任後蘇爾德卽護理撫篆至二月

初二日始行卸事其閒幾及一月既未將秦廷基未經收禁之處查明又不催令將秦廷基解部其罪實在於此豈得僅以藩司同城爲詞自行檢舉思欲避重就輕乎蘇爾德著交部嚴加議處朕辦理庶務一秉大公悉揆其情事爲重輕從不肯稍存成見而紀綱法度所在亦不肯絲毫寬假似此吏治人心所繫豈可不加之重懲以示儆戒乎將此通諭知之○調李質穎爲廣東巡撫以閔鶚元爲安徽巡撫

由江甯布政使遷

○戊戌諭軍機大臣等阿桂等奏查

審富德扣罰士兵鹽糧銀兩一案其不應支領而領及藉端罰扣以爲彌補賞需眾口如一實已毫無可疑是富德冒濫行私蒙混欺誑其罪已干重辟至所賞銀兩細段俱係零星分派以爲人數眾多難於逐一查訊而管理賞需之李萬年等堅稱並無他故或因富德尙爲參贊大臣心存顧忌富德亦未肯遽吐實情已將富

德革職嚴訊等語自應如此辦理至所稱英泰於富德冒支濫扣之處曲爲承順已屬不堪及訊以富德有無侵漁情弊一味諉爲不知更爲蒼猾取巧並將英泰解任嚴究等語英泰竟當革職嚴訊已於摺內批示矣富德將賞需銀兩紬段零星分散以冀人眾難查此卽富德私詐用巧豫爲地步必有與眾人私分之事而藉賞多恐罹罪爲賠補仍可令眾人感激爲之抱屈其情尤爲可惡此事虛實止須嚴究富德卽可令其水落石出並無庸徧質眾人前據舒赫德英廉查富德於上年十月內差家人徐九之子自軍營送銀兩紬段等物兩車到京徐九旋於閏十月內赴涿州置地七八頃等語地價每頃以二三百金而計所值亦在二千金內外昨海蘭察自軍營赴行在詢以所得鹽菜銀兩每月不過二十餘兩富德同係參贊大臣其得項相等卽以到軍營後兩年餘所得

之銀全數寄回尙不及千數安得二千餘兩之多且富德家產向
曾查抄焉能復有蓄積而軍營甫寄銀兩回家卽置地畝其情節
更屬顯然止須問以此項銀兩從何而來諒富德斷不能復有支
飾至細段等項皆非參贊分例所應支更當問富德從何而得是
其侵肥情弊尤難隱遁且見已傳諭舒赫德英廉將富德家人槩
行拘拏嚴訊自可得其底裏著阿桂等卽將富德切實嚴審務得
確情卽行定擬具奏其英泰等並著一併嚴審具奏將此由六百
里加緊發往傳諭知之仍著將訊明緣由迅速覆奏○以陶易爲
江甯布政使由江安
糧道遷○庚子命戶部侍郎和珅軍機處行走○辛
丑上奉皇太后由濟甯州登舟

夏四月癸卯諭富德之子二等侍衛富哈善著革職拏交刑部監
禁○命劉燾會同陳輝祖查勘湖北沔陽州衝潰隄工○丙午諭

軍機大臣等會命將軍等攻得兩金川地方所有形勢最號險惡
經我兵艱難力戰而得者將士等勞績尤多均應繪畫得勝圖以
彰武成盛典今已據阿桂節次繪畫進呈而明亮一路亦有地當
險要經官兵力攻而得如宜喜達爾圖等處自應一體繪畫著傳
諭明亮逐一查明繪圖貼說呈覽○戊申弛四川松潘等處茶禁
○庚戌諭此次巡蹕所經直隸山東兩省每日俱有戲臺承應甚
或閒以排當殊屬無謂朕啓鑒前曾再三申諭勿務繁文而地方
官總不能實心仰體朕於道旁老幼扶攜瞻覲嘉其情殷愛戴每
顧而樂之至於沿途點綴飾爲巷舞衢歌之象從未嘗攬轡停輿
一爲聽覽亦何必爲此無益之繁費乎前此恭奉 皇太后巡幸
江浙臚歡祝 釐所至或綴陳鐙綵音樂以奉 慈娛因兩淮蘇
杭地本殷阜且俗尚如斯遂不加斥禁然亦初不以爲觀美若北

方風氣淳樸豈可效其所爲又從而踵事增華乎况今年巡莅山東原因臨清地方前歲經逆匪王倫滋擾閭閻恐不免凋敝故親臨閱視以慰廬懷適當平定兩金川告功闕里登堂展禮藉申五年疏闊之忱又因道經泰山扶掖安輿詣岱廟辦香展敬以迓鴻禧此則朕自抒尊養之誠有司等固不當援引南巡祝嘏之例朕省方問俗惟以民生休戚爲念而農田晴雨尤軫於衷卽如三月朔日天津途次優渥春膏夾岸麥隴菁蔥深爲欣悅乃自入山東境至今爲之望霖已經彌月雖有廉纖微潤而甘澍未得霑濡麥禾漸覺減色朕心實切焦勞卽行館供陳亦爲之居不安席豈復能適意乎督撫等當以朕此心爲心方不負朕委任至朕簡畀封疆大臣惟視其留心民事者加之恩眷從未嘗因其能辦差善承奉稍爲嘉獎此尤中外臣民所共見共聞者督撫等

可不知所趨向乎朕行事期爲天下後世法方今綱紀肅清朕巡省周咨並不以遊觀爲事詰諭諄諄督撫等尙且不能探喻朕意我子孫若能恪遵朕訓庶不至爲奢靡所移設或稍不自持略涉流連游覽督撫因而曲意逢迎其流弊伊於何底此於國運人心所繫甚鉅可不共知儆懼乎又如前四次南巡大學士傅恆綜理諸務極爲安靜邇年兩次東巡大臣等管理一切雖尙屬妥協而行營已不能如從前之一無所事又漸有餽遺之風扈從諸臣可不益加戒勉乎今日召見軍機大臣並周元理楊景素詳悉誠諭並將此通諭知之○辛亥諭協辦大學士尙書公阿桂仍在軍機處行走並著在紫禁城內騎馬○諭阿桂旣已賞給寶石頂四團龍補褂金黃帶令其服用著再加恩賞穿四開裾袍○諭富德之孫慈甯著拏交刑部監禁○乙卯以孫士毅爲廣西布政使

由大理寺

少卿

○辛酉諭鍾音奏臺灣府諸羅縣知縣李倓見年五十五歲

尙無子嗣呈請攜眷赴臺查與定例相符應請准其攜帶等語臺灣文職官員知縣以上年過四十無子者方准攜眷前往此例未知始自何時殊可不必該處雖遠隔重洋自設立府縣以來地方甯謐與閩省內地無異且各員攜眷赴任不至內顧分心於辦公亦甚有益方今中外一家更不必過存畛域之見卽如伊犁等處距邊萬餘里其駐守之將軍等官俱准其攜帶家眷何獨於臺灣過爲禁制乎王道本乎人情舊例尙未爲允協嗣後臺灣文武各官無論年歲若干有無子嗣如有願帶眷口者俱准其攜帶其不願帶者亦聽其便著爲令○壬戌賜直隸及各省召試進士舉人邱桂山等五人內閣中書諸生萬年等三人舉人○癸亥諭軍機大臣等逆酋索諾木之妻得爾日章見經議給功臣家爲奴但念

伊係布拉克底土司之女著交刑部永遠監禁○甲子以阿思哈
爲漕運總督素爾訥爲左都御史索琳爲理藩院尙書仍留庫倫
辦事豐昇額兼署理藩院尙書○乙丑 上恭送 皇太后聖輿
自寶稼營還京師○丙寅獻金川俘馘於 廟 社○諭軍機大
臣等本日據弘昫等奏覆屯婦郭孫氏前在錦州曾入邪教並剝
手化緣一案已批交該部議奏矣至摺內稱拜發奏摺卽於是日
起程回省立言殊未允當奉天陪都重地歷來稱爲盛京非各省
可比弘昫等諒所知悉摺內自應稱回盛京方爲得體雖俗語有
東三省之說統言之尙屬無礙乃竟稱京爲省則斷乎不可卽如
順天府尹近在京城遇有奏摺亦止可稱爲京師或稱爲京城豈
能因係府尹所在亦稱京城爲省乎弘昫等何不知檢點若此俱
著傳旨申飭○丁卯定西將軍阿桂等凱旋○戊辰 上自行宮

啓鑾幸良鄉城南行郊勞禮正南爲壇壇上左右列蘇上龍袍
袞服騎駕鹵簿導行將至壇軍士鳴螺饒歌樂作將軍副將軍暨
參贊領隊侍衛官兵戎服跪迎上登壇拜天自將軍以下及
在京王公大臣皆隨行禮上御黃幄將軍副將軍等率眾三跪
九叩候旨行抱見禮賜坐慰勞賜茶禮部堂官奏禮成馬上凱歌
樂作還行宮賜將軍參贊隨征將士等宴王公大臣咸與賜將軍
阿桂副將軍豐昇額參贊大臣海蘭察額森特領隊大臣奎林和
隆武福康安普爾普御用鞍馬各一疋蹕至行宮賜成都將軍
明亮御用鞍馬一於其家○上還京師○命藏得勝靈龜九
桿於紫光閣武英殿○己巳上御午門樓受俘○上御瀛臺
親鞠俘囚索諾木等罪狀命刑部將索諾木莎羅奔岡達克索諾
木彭楚克甲爾瓦沃雜爾山塔爾薩木坦皆寸磔梟索諾木等並

懸僧格桑首於市○

上御紫光閣行飲至禮賜凱旋將士及王

大臣等宴將軍阿桂以下銀幣有差○

御製平定兩金川告成

太學碑文勒石

大成殿阼階前文曰太上立德其次立功又其

次爲立言而德與功皆賴言以傳言之無文行而不遠文之時義大矣哉然傳德之辭直而寡傳功之辭費而多直而寡者不因文而德自見二典三謨經世立教是也費而多者必因文而功乃明周誥殷盤佶屈聲牙是也吾嘗讀韓昌黎平淮西碑益悉此言之不爽何則彼其藩鎮乃家奴之類慙慙因循以致宛成敵國削而平之是宜引以爲愧而不可炫以爲功賴昌黎之文幾與江漢常武同稱書定然有識者固知其辭費而多飾而未知憲宗之愧與弗愧耳今之平定兩金川之文不有類於斯乎解之者曰逆酋羈縻徼外非若淮蔡之居中土元濟之爲世臣也吾則以爲旣已受

職爲土司則是我臣而其地近接成都遠連衛藏則是我土我土我臣而橫生逆志蠶食鄰封將欲大有所爲弗勦而滅之則西川將不能安枕茲雖蕝事與平定淮蔡擒吳元濟何以異故宜引以爲愧而不可炫以爲功者以此金川之始見於己巳告功之文茲不複記記其復叛而復征則其陰謀負恩已自戊寅年始蓋戊辰之師實緣其跳梁不靖而師旣臨境彼卽窮蹙乞降遂以赦罪班師十年而其酋郎卡卽與革布什咱構衅又四年遂與綽斯甲布及三雜谷爲敵而逆子索諾木兇悖益甚自恃地廣人眾力强與各土司構兵訖無甯歲故各土司皆畏之如虎而以勢分力散又莫能如之何余以爲業已受其降不宜復加兵且蟻鬬蠻觸不足以勞王師因命地方文武大吏隨宜彈壓令弗越內地界亦足以安民而示度而不虞地方大吏欲息事而每示寬逆酋轉以爲無

足懼而日益逞其小金川逆首僧格桑者始則與索諾木水火相仇繼乃狼狽爲奸於是索諾木計殺革布什咱土司色楞敦多布取其印敕以歸而僧格桑亦侵占沃克什地界且發兵圍其土司色達拉之官寨期於必取總督阿爾泰提督董天弼知事不可掩乃有發兵之請是役也或咎阿爾泰依違誤事之過而余則以爲阿爾泰之過皆余之過蓋金川因其地險眾悍久蓄異志是以有殺至維州橋之謠則其不忘內地情率可知戊辰之役我師深入屢勝卽不宜赦其罪而受其降此一誤也甫十年而郎卡背恩作亂以及逆子踵其蹟皆不卽發兵問罪惟令地方大吏隨宜處置又屢誤也以至尾大不掉終於興師故予不咎人之議爲窮兵黷武而轉咎己之類於姑息養奸蓋中國之制外域張撻伐則彼畏而斂迹主和好則彼輕而生心漢唐宋明之覆轍率可鑒也若謂

予窮兵黷武則予賴 天恩平伊犁定回部拓疆二萬餘里豈其
尙不知止足而欲滅蕞爾之金川以爲揚赫濯紀勳烈之圖哉雖
然平伊犁定回部其事大矣然費帑不及三千萬成功不過五年
茲兩金川小寇地不逾五百里人不滿三萬眾而費帑至七千萬
成功亦遲至五年則以跬步皆險番奴效命死守故得延至今日
而我將軍阿桂立志堅定決機明敏兩副將軍及參贊領隊諸臣
同心合力各軍士敵愾奮勇凡經大小數百餘戰而後成功視平
伊犁定回部費力轉不啻倍蓰設非 天恩助順眾志成城則金
川未易言滅而國威或致少損矣是不可以不記觀斯文者尙諒
予懷慚悔過之不暇知非稱功誦德而爲言其庶幾乎繫之以辭
用誌始末云爾小金首禍曰僧格桑兵救沃什竟抗顏行督臣提
臣每事遷就知弗勝任將軍別授以破巴朗直取達圍進抵資哩

數月克之兩路夾擊遂得美諾鼠竄狼奔金川助惡旣平價拉遂
討促浸雪多境險奏功以沈奏功以沈賊更遮郊緣營怯懦遇戰
辟易兵旣無能將復失算豈如南路全師而返重調勁旅吉林索
倫健銳火器其心忠純仍分兩路堂堂正正不旬日閒美諾重定
谷噶旣入馬尼並克篆養其兵允得其力躡三路進一阻宜喜及
彼絨布遇險而止阿桂西路則屢建功羅博湖普速遜克宗喇穆
山梁日則丫口舉默格爾以擾其後明亮宜喜亦據嶺梁而復難
進徒然望洋逮昨乙未略康薩爾木思工噶賊礮並毀明亮河西
亦有所據日旁以前五十里路夾河兩軍聲息可通並清後路遜
克爾宗箇則大海昆色拉枯層層破要步步披嶮遂克勒圍紅旗
飛遞而何四月大捷未至旣克西里迺若建瓴科布索隆不日而
傾雍中舍齊易如拉朽密圍噶依賊其奚走是時河西明亮亦入

富德馬邦傳檄芥拾設非西路圍噶拉依則其兩路亦無進期諸
軍既合火攻周遭雖據三穴彼其奚逃然猶死守四十餘日計窮
力竭乞命而出金川之功阿桂居首特恩異數加之宜厚能出能
入有權有經運長擊短後實先聲金川之功允資羣力寸步層峰
冰滑石灰將軍指揮無不奮勇以此破敵鹿埕隴種金川之功非
予所期事弗可已久而得之闕猶獸困捨德雞肋念我眾勞至今
心惻金川之功允賴上蒼靖彼番徼我武惟揚勒碑太學用遵
成例靜言思之文以誌愧勒銘美誥碑文曰首禍者必有奇禍之
遭背德者必有凶德之報蓋噶拉之首禍實由促浸之教而促浸
之背德亦因噶拉之肇故戊辰之役以救噶拉而有促浸之征茲
辛卯之師以伐噶拉乃並促浸而埽彼其緩則頡利突利之相猜
急則僑如榮如之相保然而地險人強機謀深造則噶拉遠不如

促浸故美諾再入而再克雖南有僧格宗北有明郭宗而我師奮
力攻取無不立摧堅礪遂據官寨之穴害此固 皇天助順將卒
盡力而亦其首禍背德之招是用勒銘酋巢永鎮俾微勒銘勒烏
闡碑文曰美諾既克移問促浸狼狽爲奸而更謀深劫木果木其
恨至今將士何辜弗雪冤沈兵威大振勁旅繼至師分兩路谷噶
馬尼上下同心據忠敵懷西路遂進南路咯泥丫口深入妥克羅
博喇穆喇穆併占默格獲康薩爾不思工噶遜克爾宗其險難託
凡此數處林立堅礪層次攻勦我師實勞據昆邑爾乃近賊巢北
軍亦至隔河匪遙曰勒烏圍賊舊官寨垣固礪高力守要害經樓
輔車陡礪劃界木卡石城蠶簇鱗繪擊柵周遭援路截其洄水拽
橋礪土濟師穴道旁出轟以地雷凡此百計用盡無遺四面礪攻
礪摧垣裂遂督大軍斫牆衝闌遊魂弗支奔併蹙蹙功成一夕中

秋八月眾軍之力一帥之謀靖彼賊穴安我蜀陬肫乎厥忠貞乎
厥猷銘誌鴻功永示千秋勒銘嚙拉依碑文曰向不云乎弗加征
而自臣屬謂之歸順始逆命而終徠服謂之歸降若今索諾木之
窮蹙率弟兄出碣獻印不但不可謂之歸順卽歸降亦不可得而
方彼其抗命相拒歷五年之長茲已密圍巢穴火器圍攻腹心潰
內羽翼失旁方將刷砦按穴利斧其吭生擒亦易旦夕滅亡乃始
匍匐請命又安得比之肉袒牽羊嚙拉依者蓋其世守官寨故多
深塹高墻我師萬層險歷千戰威揚譬之大木已盡去其枝葉則
本根亦可待其立僵然而逆賊有言官軍若至當毀其重器聚族
焚而自戕使果如所云則雖獻馘蕝事終不如生獲盡美盡善之
慶是蓋兇渠罪大惡極而且貪生苟延以致獻俘闕下明正典刑
於是疆界厥地屯戍我兵鎮羣番而永靖樹豐碑以告功成歲在

丙申仲春日吉時夏○庚午斬逆目布籠普占巴雅瑪朋阿庫魯
及情重番犯於市

五月辛未朔恭上 皇太后徽號曰崇慶慈宣康惠敦和裕壽純
禧恭懿安祺寧豫皇太后○壬申諭福德見在途中患病請假調
理理藩院侍郎員缺著博清額補授福德到京時另候諭旨○刑
部奏逆酋索諾木及其兄弟大小頭人等暨各犯家屬二百五十
餘人械送至京分別辦理除因病身死各名外索諾木係賊酋首
犯其兄莎羅奔岡達克索諾木彭楚克甲爾瓦沃雜爾主謀助惡
其姑阿青白郎卡歿後一切聽其專主及阿木魯綽窩斯甲俱係
用事大頭人都甲喇嘛雍中澤旺堪布喇嘛色納木甲木燦助逆
呪詛以上十三犯罪大惡極均經凌遲處死索諾木之母阿倉頭
人尼瑪噶喇克巴阿布頗魯格什納木喀爾結達什色格桑達爾

什納木甲達爾什桑卡爾喀什巴拉木布籠普占巴雅瑪朋阿庫
魯達什溫布策旺沙巴租普阿布穆木里撒思丹扎布僧格格布
爾章阿杉車斯局斯達拉等或黨惡與謀或領兵抗拒又斯丹巴
係首逆索諾木之弟七圖阿甲係逆犯七圖安堵爾之子阿咱納
係逆犯蒙固阿什咱阿拉之子上十九犯均經處斬此外番犯
及家屬等永遠監禁者十六名發往伊犁給厄魯特爲奴者五十
二名索倫兵丁爲奴者四十五名三姓爲奴者三十四名賞功臣
之家爲奴者五十八名跟役班第喇嘛發往江甯喇嘛寺安插役
使者十五名通計渠魁首惡以及逆黨餘孽或寘之重典或貸其
餘生悉準其情罪之重輕以彰威德茲當獻俘事竣請將先後辦
理緣由宣示中外報聞○癸酉以孔傳炯爲江蘇按察使

由蘇松
糧道遷

○乙亥諭董天弼前在布朗郭宗駐守庸懦貽誤雖死不足蔽辜

因將伊子發遣以示懲戒今大功已經告成所有各項功罪俱應確覈念董天弼初隨征勦時尙有出力之處著加恩將伊兒在遣所諸子俱放回本籍其各本身原有前程仍著給還至宋元俊獲罪本由自取念其在川年久亦有微勞伊子著一體加恩釋放回籍復其衣頂以示朕肆眚施惠之意○諭軍機大臣等富德前在軍營多用賞號銀兩朕以軍營官兵凡有奮勉出力者俱覈其功績分別升拔賞賚各項加恩之處不爲不多何以復有賞號名色節經降旨查詢並交部覈辦矣今日據阿桂奏稱賞號一項係沿川省之舊不但將軍參贊等各有賞號備用卽總督衙門亦有賞需銀數千兩等語總督養廉豐厚遇有獎賞之事理應於養廉內自行賞給何得復備賞需款項此實相沿陋習亟宜刪除惟新設之成部將軍管轄畧番每有必需賞犒之事而所定養廉較少若

再令其自行發賞未免不敷用度自應酌量加添俾無缺乏著傳
諭文綬即將該督衙門所有賞需一款永遠裁去其成都將軍每
年應添給養廉數千以供賞用但不必仍留賞需名色將此由四
百里傳諭知之仍將作何酌定之處卽行覆奏○戊寅刑部奏審
訊已革參贊富德扣罰土兵鹽菜銀兩彌補賞需一案富德仰蒙
廷訊俯首認罪無可置喙查富德於賞需項下扣得元寶六箇入
己又收受保舉知府曾承謨餽金五十兩又任性參革副將廣著
不候明旨卽令充當兵丁致廣著自戕身死以上各款業已罪有
應得至密封清字奏單所稱阿桂手持黃帶口發狂言一節據供
因被嚴參自知必死心懷憤恨砌款陷害等語富德屢獲重罪蒙
恩復用並不奮勉立功狠鄙貪詐至將狂悖大逆之詞寫列參單
上達御座以律應寸磔之罪有心誣陷應照誣告大逆律擬斬

請旨卽行正法至已革總兵英泰於富德剋扣兵糧通同舞弊應發往伊犁充當苦差開泰係富德保舉升用於參奏廣著徇私附和及押解富德時並不嚴加管束一任伊家人前站騷擾迨恐彰著難掩始以一稟塞責實屬狡詐應發烏嚕木齊當差候補知府曾承謨因富德之母生辰餽送金兩殊屬不合應請交部嚴加議處得旨富德著卽處斬英泰開泰曾承謨均如所議行○庚辰以塔彰阿玉鼎柱俱爲內閣學士塔彰阿由光祿寺卿玉鼎柱由給事中選○以耀海爲左副都御史由太常寺卿選○癸未上奉皇太后啓鑾秋獮木蘭○免經過地方本年額賦十分之三○己丑上駐蹕避暑山莊○庚寅軍機大臣等議奏兩金川解到番子男婦一百八十九名口遵旨照回人入旗例編一佐領入內務府正白旗請設佐領一員驍騎校一員領催四名馬甲七十名但番子初入內地旣不曉事

又不識字其新設佐領一缺暫由內務府揀員補放交禮部照例
鑄給圖記再由內務府派驍騎校一員領催二名馬甲三名率領
番子中新設驍騎校領催等辦事至新設馬甲缺由內務府撥給
三十五缺再新設三十五缺應得錢糧暫行存公不必分給另派
內務府幹員搏節經理養贍伊等統俟數年後番子等漸諳事務
其新設佐領再由番眾揀選充補應得錢糧按名分給並將內務
府兼理之官裁撤至伊等棲止之所請交健銳營大臣於香山附
近令其建碣居住從之○壬辰吏部議准貴州巡撫裴宗錫奏遵
義府屬仁懷通判遠駐赤河與四川瀘州合江敘永廳三面聯界
五方雜處最易藏奸應改爲直隸要缺同知從之○癸巳 上詣
廣仁嶺恭迎 皇太后鑾輿駐蹕避暑山莊○丙申諭福德著授
爲額外內閣學士仍在軍機司員上行走○是月兩江總督高晉

江南河道總督薩載奏臣高晉在工二十餘年知河道通塞靡常
變遷莫定不惟海口茫茫萬頃無可施工卽黃河坍長亦難疏治
惟有將清口內通湖引河設法挑挖使得暢流匯黃東注併力刷
沙則黃河不濬自深海口不疏自治補偏救弊此或一法向來洪
湖誌椿存水九尺是湖水未能暢出遇黃盛漲必有倒灌之慮黃
運兩河淤墊在所不免須於冬春水落時照依各引河寬長丈尺
兩頭煞壩大加挑挖並將清口東西壩基址移下一百六十丈使
清水暢流有力批此係治本之論宜實力爲之又奏清口之西所
建各架木龍原以挑溜北趨冀刷陶莊積土使黃不偏清之意歷
年雖著成效但驟難盡刷若於陶莊池上積土之北開挖引河一
道使黃水離清口較遠清水益得暢流至周家莊會黃東注不惟
可免倒灌而二瀆並流河海淤沙漸可攻刷卽堰圩工程亦資穩

固所謂治淮卽以治黃舍此別無良法批此亦一法勉爲之又奏
見在伏汎將屆情形不定請於霜降後相機酌辦得旨此奏皆合
機宜形勢是治淮黃一大關鍵屆時妥爲之

六月庚子朔諭昨四庫全書館呈進袁集永樂大典散篇內有麟
臺故事一編爲宋時待制程俱撰具詳當時館閣之制所載典掌
三館祕閣書籍以執政領閣事又有直祕閣祕閣校理等官頗稱
賅備方今蒐羅遺籍彙爲四庫全書每輯錄奏進朕親加披閱釐
正特於文華殿後建文淵閣弄之以充冊府而昭文治淵海縹緗
蔚然稱盛第文淵閣國朝雖爲大學士兼銜而非職掌在昔並無
其地茲旣崇構鼎新琅函環列不可不設官兼掌以副其實自宜
酌衷宋制設文淵閣領閣事總其成其次爲直閣事同司典掌又
其次爲校理分司註冊點驗所有閣中書籍按時檢曝雖貢之內

府官屬而一切職掌則領閣事以下各任之於內閣翰詹衙門內兼用其每銜應設幾員及以何官兼充著大學士會同吏部翰林院定議列名具奏候朕簡定令各分職繫銜將來卽爲定額用垂久遠至於四庫所集多人聞未見之書朕勤加採訪非徒廣金匱石室之藏將以嘉惠藝林啓牖後學公天下之好也惟是鐫刊流傳僅什之一而鈔錄儲藏者外閒仍無由窺覩豈朕右文本意乎翰林原許讀中祕書卽大臣官員中有嗜古勤學者並許告之所司赴閣觀覽第不得攜取出外致有損失其如何酌定章程並著具議以聞尋議請參倣宋制置文淵閣領閣事二員以大學士協辦大學士翰林院掌院學士兼充總司典掌置文淵閣直閣事六員以由科甲出身之內閣學士由內班出身之滿詹事少詹事侍讀侍講學士漢詹事少詹事侍讀侍講學士等官兼充同司典守

釐輯置文淵閣校理十六員以由內班出身之滿庶子侍讀侍講
洗馬中允贊善編修檢討漢庶子侍讀侍講洗馬中允贊善修撰
編修檢討及由科甲出身之內閣侍讀等官兼充分司註冊點驗
以上皆爲定額仍倣宋代館職結銜例一切章奏文移令其繫銜
於本銜之上如遇缺員領閣事直閣事由翰林院具疏請簡校理
由領閣事大學士會同掌院學士遴員引見如遇出差照日講官
例請署再管鑰啓閉內府司存亦宜參倣宋制置提舉閣事一員
以內務府大臣兼充如遇缺員卽由內務府具疏請簡再排次清
釐似非內府員役所能亦宜參倣宋制置文淵閣檢閱八員以由
科甲出身之內閣中書兼充如遇缺員由領閣事大學士遴員奏
補至閣中書籍若緊許開函繙閱不無黷損請俟全書告竣後各
藏副本於翰林院如大臣官員欲觀祕書准其告之領閣事赴署

請閱有願持筆札就鈔者亦聽不許私攜出院如遇疑誤須對正本者令其識明某書某卷某葉某書一單告之領閣事的派校理一員同詣閣中請書檢對從之○乙巳諭軍機大臣等英廉等覆奏查辦京城錢價頗長一事查獲經紀馬成騏句通商人高擡時價見在設法研訊仍將擡價之奸商鋪戶上緊訪查等語已於摺內批示此事既經查出經紀馬成騏希圖用錢暗中增價供認不諱卽係倡議增價之人止須將該經紀照例治罪其餘鋪戶人等俱可不必深究但恐奸商等妄以爲法不及眾日久仍復效尤著傳諭英廉袁守侗蔣賜棨等卽徧行出示曉諭以此次尙係初犯且一聞查拏錢價卽日就平減是以止將爲首之人懲治嗣後如有不法商僧仍然商通擡價者定行嚴加窮究一併拏獲治罪決不再爲寬貸於京城內外及錢市鋪門黏貼多張俾奸商猾僧觸

目警心庶不逞其故智○丙午諭軍機大臣等連日召見正定鎮總兵嵩安及建昌鎮總兵靈山二人俱在軍營著有勞績人亦明白去得因降旨列入後五十功臣將原擬之福珠里倭昇額二人換去矣靈山尙在熱河已令軍機大臣將伊帶兵出力之處詢明具奏嵩安初二日召見後卽令回京束裝赴任計其到京後自尙有數日居住著傳諭舒赫德等將嵩安勞績詢明覆奏至嵩安靈山俱應畫像並著阿桂豐昇額傳至造辦處爲伊等繪畫○丁未以沈初爲禮部右侍郎由詹事遷申甫爲左副都御史由通政使遷○壬子諭軍機大臣等昨據勒爾謹奏於途次接奉諭旨知甘省各屬被旱情形隨卽兼程馳回甘肅率屬實力查辦茲復據王直望奏皋蘭等二十九州縣禾苗被旱業已成災五月二十二三至二十八九等日各處有得雨五六寸至深透者雖夏禾不及接濟於秋田

大有裨益等語已於摺內批示一切妥爲之以救窮黎矣勒爾謹
回任自必督王直望飭屬確勘妥辦但竭伊等心力不過就災辦
災恃有國家帑項董率地方官詳慎勘查實心賑恤嚴禁吏胥等
剋扣侵肥使災黎得以均霑實惠此雖足卸牧民之責何嘗通盤
籌畫計及久遠之計哉如甘省捐監收糧貯倉原以備賑贍難供
之用其法仍不離乎豐斂而歉散見在被災之處夏禾旣已無望
其糶價自必加昂若再令買穀交倉則市口糧食價必更長閭閻
日糶餬口倍覺艱難自應令此成災之二十九州縣廳暫停捐監
多留市米以供民食其餘不被災各屬糧充價平之地又當多爲
收捐運至辦災處所以資接濟此亦酌劑盈虛轉移利便之法不
知勒爾謹等見係如此籌辦否至甘省地瘠民貧災歉幾無虛歲
惟恃賑濟賙給賴以生全年復一年究非長策在朕念切痾瘵惟

恐一夫失所原不惜歲費帑金而爲地方大吏者目擊民艱豈可不早爲悉心規畫必待其既荒始藉賑恤以爲補救乎卽如烏魯木齊一帶地皆沃壤可耕之土甚多貧民果能往彼墾殖不但可免於飢窘並可贍及身家此乃天地自然之美利供民取攜昔爲外夷地固不可行今幸入我版圖近在邊地百姓自當成就樂土共享豐饒是以屢諭該督等善爲勸導俾其羣往謀生自求樂利而厯任督臣總未有辦及者大率以爲人情安土重遷難以勉強此固愚氓之昧於自計亦由大吏之心存畏難若云小民憚於遠涉則山東之距塔子溝等處較之甘肅至烏魯木齊其道里約略相倣何以每歲山東出口之人扶老挈幼不可數計雖禁之亦不能止而甘肅之人獨不聞有赴新疆之事甚且勸之仍裹足不前乎蓋百姓可與樂成難與圖始如知有利可圖自皆趨之若鶩直

隸各口外卽其明驗甘肅督藩等何獨不能設法勸民俾之聞風鼓舞而徒聽其終歲嗷嗷待哺乎從前招徠貧民出邊曾有辦過之案督臣等每因資送需費不肯多辦此在平時則然若當被災之餘撫恤賑濟每戶原不無所費設以十年而計每年每戶約須賑恤若干若合五年之費爲資送之需亦當足用雖見在所費較多而算至十年則已省其半且此時多送一人往邊外耕作將來邊內卽少一待賑之人如此遠籌其省更不知凡幾在國家爲一勞永逸之計在閭閻爲去苦就樂之圖而出邊戶口日多家計日益饒裕邊鄙窮黎自皆聞風趨赴並可不再煩官爲勸諭一舉而兼數善該督等又何所畏而不爲乎著傳諭勒爾謹王宜望卽照此旨實心熟籌善體朕意妥爲經理毋負朕諄切委任之意仍將作何酌定妥辦之處迅速詳悉覆奏將此由五百里傳諭知之○

丁巳命重繪盛京等處地圖分注 開國事蹟○命同省官員同名令官小者改避○癸亥諭向來道員委署兩司其應奏交代等事俱詳請督撫代奏固遵定例辦理但兩司爲錢糧刑名總匯各任內俱有應行入告之事道員旣經署篆其實任卽與實缺藩臬無異如遇應奏事宜原應照兩司具摺旣於公務有益並可藉以覘其才識如何亦屬集思廣益之道何必轉牂督撫多此一番轉折乎且雍正年間道府原有許其自行具摺者後因其無所建白遂行停止若道員旣署司篆則又不必拘於此例矣嗣後道員中有委署兩司者俱准其照藩臬一體具摺奏事著爲令其或喜事之徒因有此旨於署理兩司時妄行陳奏心存覬覦傾陷此等伎倆亦難逃朕洞鑒也將此通諭知之○甲子習封順嬪爲 妃○乙丑諭 關帝在當時力扶炎漢志節懷然乃史書所諡並非嘉

名陳壽於蜀漢有嫌所撰三國志多存私見遂不爲之論定豈得謂公從前世祖章皇帝曾降諭旨封爲忠義神武大帝以褒揚盛烈朕復於乾隆三十二年降旨加靈佑二字用示尊崇夫神之義烈忠誠海內咸知敬祀而正史猶存舊謚隱寓譏評非所以傳信萬世也今當鈔錄四庫全書不可相沿陋習所有志內關帝謚應改爲忠義第本傳相沿已久民間所行必廣難於更易著交武英殿將此旨刊載傳末用垂永遠其官板及內府陳設書籍並著改刊此旨一體增入○丁卯命兩江總督分年赴江蘇安徽江西三省會勘秋審著爲例○己巳朝鮮國權署國事李祘奏朝鮮國王李昉於乾隆四十一年三月初五日薨逝一摺得旨朝鮮國王李昉謹守藩封五十餘年恭順事上慈愛撫民深爲可嘉忽聞患病溘逝朕心不勝軫惻應得卹典著察例具奏該部知道